


TEZAU LITURGIC
15 AUGUST
+GRIGORIE ȚAMBLAC,
MITROPOLITUL KIEVULUI

STIHIRA
LA
ADORMIREA
MAICII
DOMNULUI



MOSCOVA, 2020



Месяца августа в 15 день, на Успение Пресвятыя Богородицы, Осмогласная Успенская стихира «на целование»

творение Григория Российского Цамблака

(глас 8:) Днесь Владычица и Богородица,
Пресвятая Дево Царица переходит от земных к
премирным, ко Царю царствующему, к Сыну
Своему и Богу, сопричастится царствию
вечному, паче же превечному и конца не
имущему, не на колеснице рабски, якоже Илья,
но матерьски Царица царски, на Сыновних
руках со множества вой херувимьских. И тогда
лучший апостолом предпосылаеми, по облаком
предпоставляеми пресветлыми ангелы
пречистому твоему и богоприятному телу,
преукрашенной церкви Царя небеснаго,
(глас 1:) в нейже непостижимый и
неприкосновенный пишется плоть, и от сосцу
животочному доится. Бог убо сый, сподоби за
милосердие совершенно вообразитися Ею во
человечество и подати ему Божества достойание.
И предсташа весь лик богословец, не
дванадесятех, но и седмьдесятех, исходныя
песни пояху, честь воздающе апостольскаго

сословия, глаголюще: “Что Тебе речем? Киими миры проводим Тя, Мироприемнице небесная? Кое кадило принесем Ти, золотая кадильнице? Недоумеемся, яко одр великаго Царя, на мале одре мертволепно без дыхания лежит”.

(глас 5:) Приим же Петрово воспевание, Павел, сосуд избранный, весь изступль, весь восхищен, весь обожаемъ “о чюдеси! — глаголав, — како затворишася девственнии очи, от самех пелен ангелы зрети навывоша? Како питательница жизни смертию объята бысть? Како и не сохранися безсмертна, якоже нетленна по Рождестве сохранена бысть? Како небесная лестница, по нейже сниде Бог ко человеком, затворитися грядет? Како гора превысокая и великая Божия на мале одре лежит, в нейже вселися до конца Господь? Како жезл присноцветущий ныне увянув зрится?.

(глас 2:) О преславнаго зрения! О непостижимаго таинства! О глубина богатства, и Премудрости, и разума Божия, яко не испытаны судьбы Его и не наследованы пути Его! Кто разуме ум Господень или кто советник Ему бысть?

(глас 6:) Почто отлете от нас, от Своих раб, голубице неблазненная? Почто удалися от нас горлица сладкогласная? На кого возрим прочее? Кто нам провещает? Кто же от навет иудейских печаль нашу утешит? На Тя бо зряще, Онаго

зрети мнехом, Иже неизреченно из Тебе возсиявшаго. Взнесися ко Спасу, и мы надежду нашу вси на Тя имехом, и сладце терпехом и труды, и гонения о проповеди истинней; (глас 3:) ныне же последнее сиротство объят нас. Како внезапно угасе светильньче свету? Но смотрение, еже на Тебе бываемое, а не одоление смертное; ниже возмогла бы, яже единою Твоим Сыном умертвившись смерти, Тебе животу привязаться; но да не вменится привидение вочеловечения истина подобь и бессмертному Твоему плоду естества долг отдаеши”.

(глас 7:) И вся, к чести ключима, исходному времени песни пояху Приснодевей Божий Матери, Ияков, великий Божий брат, со Иванном, сыном громовем, и инии богословеснии мужии, достойнии предстояний пречистаго Ти телесе, мрежею евангельскою и Павлим языком уловени, Дионисие, и Ерофеи, и Тимофее, глаголюще: “Пойди, Владычице, пойди, яко землю освятила еси Рождеством Своим, тако и воздух освятиши пришествием Си. Пойди, Всецарице, пойди и сцарьствуй с Сыном Своим и Богом нашим.

(глас 4:) Да отверзутся Тебе врата небесныя со мнозем удивлением, яко Евва убо врата Едему затвори, Ты же и небесная врата отверзе. Ниже убо достойно есть двери непроходимей, еюже

Господь един вниде и изыде, затворенну остави, на земли стояти; но взятой быти ко уготовленному Тоя чертогу. Да подымут Тя, Дево, херувими, да прославят Тя силы, да предтекут Ти престолы, зряще Тя престол неопisanного и безтрудного естества. Пойди, Невесто невестная, в невестник небесный!” Сия богословяху и иная многая чюднии они мужи, якоже никтоже может по достоинству изрещи, ко гробу провождающе жизни Матерь. (глас 8:) Мы же что к Ней речем? Како род наш почетшую почтем? Како воспоем многопетую Деву? Како возвеличим, Юже вси роди величают, якоже прорече? Но возопием с Гавриилом: “Радуйся, древе жизни, радуйся, горо присенная, радуйся, мосте преводяй всех, иже верою Твое преставление чтущая, к вечному”. Подобае бо Ти, Матери Божий, яко Царице, царскими добротами дороноситися, преходиши бо к небесней стране, небесная Невесто, и паки жива представляеши к Божественней светлости, яко от чертога населения Твоего, от земли взимаеши и соводиши с Собою множество ходатайством Си. Предпосылают Ти ся апостоли со ангельскими воинствы, и девствении лица тайно окрест одра Девы Богородицы предстоят, и душа праведных, пролетевши, Царицу славят,

и молятся ови невестственно пение добродетелей принесете. Царица небесная и многопетая Владычице! Сродна присвоения не забуди, и не оскудей назираючи, и не забуди царя, и град, и люди, иноцы и простии. Мы бо люди Твои и овца пажити Твоея, имя Твое призываем и верно празднуем всесвятое Твое Успение.

Источник: В. Ундольский. Замечания для истории церковного пения в России. // Чтения в Московском историческом обществе. 1846. № 3. Отд. 1. С. 4—6.

